

Usvojena Provedbena pravila za popunjavanje registara IPP FBiH i Provedbena pravila za metapodatke IPP FBiH

05.09.2024 16:53



Infrastruktura prostornih podataka Federacije Bosne i Hercegovine

Vijeće za infrastrukturu prostornih podataka Federacije BiH je na redovnoj 42. sjednici održanoj u Sarajevu 04.09.2024. godine usvojilo Provedbena pravila za popunjavanje registara IPP FBiH i Provedbena pravila za metapodatke IPP FBiH.

Usvajanjem Zakona o infrastrukturi prostornih podataka Federacije Bosne i Hercegovine („Službene novine Federacije BiH“, broj: 55/21) stvoreni su preduslovi i potreba za izradu podzakonskih propisa koje na prijedlog Koordinacionog tijela donosi Vijeće IPP FBiH. Zakonski osnov za donošenje ovih provedbenih pravila je član 12., 13. i član 14. Zakona o IPP FBiH koji predviđaju donošenje provedbenih propisa kojima će se definirati metapodaci i tehnički uslovi interoperabilnosti, harmonizacija i dijeljenje izvora prostornih podataka.

Provedbenim pravilima za popunjavanje registara IPP FBiH uređuje se postupak unosa podataka u Registre infrastrukture prostornih podataka. Tehnički dio provedbe ovih pravila, detaljniji naputci i pojašnjenja sadržana su Uputama za ispunjavanje Registra subjekata i Registra izvora IPP, koje također usvaja Vijeće IPP FBiH i čine sastavni dio ovih Provedbenih pravila.

Provedbenim pravilima za metapodatke IPP FBiH propisuju se kriteriji, norme i način prema kojem se dokumentiraju i razmjenjuju metapodaci subjekata infrastrukture prostornih podataka Federacije Bosne i Hercegovine, a uključuju i Upute za popunjavanje Kataloga metapodataka IPP FBiH, Profil metapodataka, Specifikaciju za metapodatke IPP FBiH i Rječnik za metapodatke IPP FBiH.

Usvajanjem ovih podzakonskih propisa, subjekti IPP FBiH, Koordinaciono tijelo, kao i korisnici prostornih podataka ostvaruju značajne prednosti. Za subjekte IPP FBiH, ova pravila pružaju jasne smjernice o tome kako dosljedno unositi podatke u registre, čime se osigurava standardizacija i kvalitet podataka na nivou cijele Federacije. Koordinacionom tijelu omogućava se efikasnija koordinacija i nadzor nad unosom podataka, kao i lakše upravljanje registrima i metapodacima. Korisnici podataka, s druge strane, dobivaju pristup bolje organiziranim i pouzdanim prostornim podacima, što olakšava njihovu upotrebu i analizu. Provedbena pravila jačaju interoperabilnost i harmonizaciju podataka, olakšavajući njihovo dijeljenje i korištenje među različitim institucijama.

Ova pravila će biti objavljena u službenim glasilima FBiH i na službenoj web stranici IPP FBiH, čime će se osigurati transparentnost i dostupnost svim zainteresovanim stranama.